

欽  
定  
全  
唐  
文

欽定全唐文卷四百二十一目錄

新文藝出版社藏書

楊炎一

靈武受命宮頌

并序

鳳翔出師紀聖功頌

并序

大唐河西平北聖德頌

并序

王縉兼幽州節度使制

杜鴻漸兼東都留守制

諭梁崇義詔

請行兩稅法奏

欽定全唐文

卷四百二十一

目錄

請留崔寧以收蜀奏

言天下公賦奏

河西節度使廳壁記

河西節度使杜公碑

大唐燕支山神寧濟公祠堂碑

欽定全唐文卷四百二十一

楊炎 一

炎字公南鳳翔天興人肅宗朝禮部郎中知制誥遷中書舍人德宗立拜門下侍郎同中書門下平章事轉中書侍郎罷爲左僕射貶崖州賜死年五十五後詔復官謚肅愍左丞孔戣駁之更曰平厲

靈武受命宮頌

并序

臣聞享天降命惟德也戡難奉時惟聖也必有非常之運是興撥亂之功以蒼生爲憂不以濡足爲患以寧濟爲業

不以修身爲道此陶唐所以捨而不畏舜禹所以受而不疑靈武舊宮皇帝躍龍之所日者奸臣竊命四海蕩波我聖皇天帝探命歷之數啟龍圖作受命之書付與我皇帝皇帝方遊崆峒以求至道於是羣公卿士負玉旒金璽望氣於芒碭之野三進於閭闔之中曰臣聞在昔蚩尤連禍大盜中國神農氏兵莫能勝天降元女敕軒轅氏大定其災厥後堯有九州之害而命禹禹以四海之功而受舜陛下主鬯大位十有九年精爽者皆美德馨乾坤也必聞幽贊元德上達景福有歸六聖觀命歷之期兆人有臨難之

請陛下畏災運而不取棄黎元而不顧以至仁爲薄以大  
寶爲輕臣等若不克所請與億兆之衆將被髮拊膺號於  
天而訴於帝矣皇帝唯然改容曰豈人心歟丁卯廣平王  
倣太尉光弼司徒子儀尚書左僕射冕兵部尚書輔國與  
北軍將士西土耆老萬五千人排闥以訴帝曰今豺狼穴  
居宮闕陛下兆庶爲餌宗廟爲墟若臣等誠懇未通是高  
祖不歆於太廟且陛下涉渭則洪流涸迴鑿則慶雲見布  
澤而川池廣勤道而嘉禾生靈祇髣髴元貺幽感臣聞符  
命待聖而作天運否終而會歲蕤胘蠻會也睿武英明聖

也臣等敢昧死上聞帝乃灑齋宮啟金匱嗚咽拜受詔有  
司大赦天下改元曰至德元年尊聖父爲文武大皇帝是  
日煙雲變作士庶踴躍黃龍見於東郊紫氣滿於天門翌  
日也數百里衣裳會兼旬也數千里朝貢會踰月也天下  
兵車會浹時也四方戎狄會以一旅成百萬之師率胡夷  
平社稷之難禮郊祀戴聖皇與人合誠心以氣消天癘動  
罔不吉歆無不報是以白鹿擾於王庭靈芝產於延英化  
動而功成淵默而頌聲言禪代者陋蒼梧易姓之名語嗣  
守者羞陶唐積善之辱述戡定者歎四紀而復夏美中興

者嗤四七而滅新於戲神祇之所歸往品物之所法象鼓  
飛龍於尺水仗大義而東向矢謨發號實在茲都願篆石  
宮庭以垂萬古俾過山澤知風雨之奧窮造化識天地之  
蘊臣炎稽首敢獻頌曰

赫赫河圖啟天之祐雲從億萬皇在九五惟昔陶唐克傳  
舜禹濩也武也夫何足數彼妖者勃惟暴惟貪天寶即命  
人將不堪皇曰內禪於再於三盡武之善去湯之慙兵車  
百萬洶洶雷震橫會九州爲行爲陣恃力者踣從命者順  
孝以奉天神而撫運至德唐堯崇功大禹皤皤北叟垂白



金史卷之三  
而觀沛邑空歌周原已古排律頌聲永介茲土

鳳翔出師紀聖功頌

并序

舜有兩階之舞周有孟津之會皇帝有岐陽之蒐德莫勤  
乎安國勛莫配乎立極利萬物莫近乎去暴蓋受天元符  
與人請命冥契相合億兆有歸以昌則感神鬼之心以征  
則去雲雷之難維唐七葉姦臣犬吠於二京皇帝龍鳴於  
河北觀兵雍上建都發號以朝萬國心嚮天地志通幽昧  
淳精四達大造元成於是巢山駕海之羣狼蠹鳥章之君  
不期而趨於闕下者四十有三萬元帥廣平王俶太尉光

弼司徒子儀等稽首言曰臣聞天啟聖以俟時聖感時而  
赴難非神功不能當大運非元德不能合人心故軒轅之  
道也伏蚩尤宗周之仁也稱襁負陛下之德大瑞於人和  
人和而動天天與和合氣百姓因之以獨化四夷因之以  
子來王師得之以貞勝意者河洛僊怨後東征之期人靈  
駿奔望西狩之禮天子方齊寶輅講金匱之書翌日霓旌  
武賁大車之輪黃鉞靈鼉彤弓太阿荆韓楚魏之廣七閩  
五獠之長金鼓百萬車徒九合大陣於東郊皇帝建白旄  
以誓於軍曰維高祖歆於上天四宗重光照臨下土百有

五十祀至於聖皇總武之干戈備文之法象叢爾逆虜敢  
迷天紀盜我符璽黷我威靈使四海之內兵革縱橫肝腦  
塗裂昊蒼降鑒錫命於予俾續夏已墜之功寬堯未刑之  
族於戲余匪玉帛山河是愛惟蒼生災害是憂匪天命威  
力是憑惟人心忠義是保咨爾張目成天羅植髮成千櫓  
布和成將帥厲氣成風雲若作進退爾惟旗鼓若斷首尾  
爾惟常蛇若戮鯨鯢爾惟干將若拯沉溺爾惟巨艦夏有  
一旅之衆武有十人之謨志定金石信非盟誓爾其念哉  
是時天威動六合兵氣連太白乾坤爲之袂軋河嶽爲之

振蕩彼狐鳴鑿齒之徒不崇朝而聲反於謳歌形歸於蹈  
舞者幾過半矣故鄴杜之師以形勝灞上之兇以威逐桃  
林之陣以奇破河洛之孽以氣摧帝乃開天牢迴豹尾陵  
顥氣掃欃槍應龍秉鉞元女侍坐乃考夏氏配天之義備  
漢皇建武之典雲髦玉輅山動地踴降自西雍幸於京師  
萬姓前導百靈爲衛布德澤望陵寢悲黍稷之將秀覽城  
闕之爲墟以雷雨洗川澤以皇風清怨怒以大賞議勤勞  
以成功告宗廟以祥刑去孽昧以惠政哀困窮清蹕而奉  
聖皇稱觴以朝前殿於是東國耆老長安士庶排玉輅入

天庭動千門呼萬歲煙雲下遶林藪山迴神靈頌於堂精  
魄感於廟王侯慶於國父子洽於家鐘石反於懸壘俎陳  
於席華戎踴躍喜氣磅礴日退三舍天聲萬里神謀不得  
窺其與天道不能後其時斯一會之略也然後動變化爲  
鑪假仁義爲途陶氣象鑿耳目與人合司契以道浸澆醜  
全屏象之形斷珠玉之脛然後以景星燭夜甘露清氣昇  
閭風對天姥捨鴻名以還太素乘大厯而統人紀俾不思  
而降不祭而歆以元和感生淳古於是宰臣聚而言曰主  
上以神武清難至德遂人崇勛絕瑞光照萬古開闢日月

於今六年百姓豈忘功於帝乎人臣盍謝生於天乎請相  
與鑿石於誓師之場告成於得眾之地斯王道之盛典臣  
炎稽首敢獻頌曰

天命帝兮蕩妖昏交風雨兮會秦門惟聖德兮漫海外五  
單于兮勇士會俗鳥獸兮家雲島越浮山兮泛青草徵羽  
騎兮列天營啟金滕兮賜長纓日爲車兮雷爲鼓醢鯨鯢  
兮掃煙雨開明堂兮饗文祖帝爲皇兮后爲母歌雲臺兮  
冊玉府篆穹石兮駕終古

大唐河西平北聖德頌

并序

維唐至德二年春正月武威郡胡泊九蕃夷落內伺師旅之間外合狼豕之兇據金城害州伯蛇變交戰之下炎焚大澤之中二月乙丑皇帝以五命之服詔太僕崔倕總中權專上將誓軍前之士卻城下之盟又命內常侍劉日新振鼓鐸之音護羌戎之長林竦蜩合會於東郊粵庚午高牙大旆鐵馬長鍛歆以清笳陣以雲蛇列於四衝蓬頭執戟鼓以靈囂進於遠路趨悍獷獫狁虎裘猿臂北陵於土門之隊鉤車雲梯强弩堅楯齊傳於西峰之亭於是引熊虎之師杖龍蛇之劍矛戟四起煙塵火色金鼓一振天地徘徊

徊血亂元黃聲囂瓦屋是風雲皆入陣彼草木盡爲兵日月垂照於窮鄉皇靈赫臨於天外名王貴馬大玉文貝素女錦衣百金之產萬井之資皆委於入貢之府布於有地之宮是時也千人踊萬人賀美太階之符見頌偃伯之議興特進金城太守李萬頃洎五邑長吏軍政大夫等言曰蓋聞王命先天以奉時賢臣合統以偕運靡乘乎帝籙不能撥亂罔應乎間氣不得遭逢故大人之作必先靖難以摧兇取暴爲治國以任賢仗能爲建功磅礴乎茅茨之下歲蕤乎元古之上使軒轅得之以勝蚩尤大夏得之以勝



有扈西伯得之去殷伐崇我太宗得之奄有遼海上皇得之克平巨猾陛下得之再清宇宙掃蕩氛孽允若大唐之新命復高祖之天下臣等恭惟六聖騰光百有五十祀周賁海寓鋪敷茵黼丹穴之賁孤竹之君金闕括羽委命下吏陛下建大號續鴻業歸勛祖禰昭事聖皇是必天錫忠良佐成命器二臣所應皇運之統伏崇羽之兕太康西人永永來裔願篆石誌美以爲頌云

詔虎臣兮殪天狐載火旗兮耀昆吾霽塵壘兮被戎都

王縉兼幽州節度使制

門下王制以二老分理諸侯則周召之任及乎漢魏以還  
多亦軍國兼總絳侯所以參掌武事安石所以外綏戎政  
況華夷甫寧金革方偃實在於文武戮力上下同心則輔  
弼之臣豈憚勞也金紫光祿大夫門下侍郎同中書門下  
平章事持節河南副元帥都統河南淮西山南東道諸節  
度行營使兼東都留守王縉體含元和器蘊金璞以才茂  
邦傑以識通時化叶我期運任當衡石竭股肱之力開耳  
目之明陟於艱難致君以道統是經術麗茲闕人屬江淮  
海岱之虞總授鉞旌旄之寄鎮禦方夏撫寧師人保合太

和總宣庶績忠而佐命功比安劉勤以施下惠同思杜所  
藩維之志建竹帛之勲

關二  
字

朝暮載申啟沃與二三髦碩

同力叶誠俾予端拱以宏至道乃眷北土古之幽都限夷  
既雄負海稱固思致於理言恤其人爰藉台臣宏敷廟算  
持薊門之麾旆兼遼陽之鉦鼓俾膺戎重式允時望可兼  
幽州長史持節充幽州節度副大使知節度事餘並如故

杜鴻漸兼東都留守制

門下東周以召公相宅西漢以蕭何居首則保釐之寄多  
屬輔臣今以廟堂碩老坐而敷政和恒居師用又厥服特

進行門下侍郎中書門下平章事山劍副元帥太清宮使  
崇元館大學士上柱國衛國公杜鴻漸誕受天和陶合一  
氣德言敬直動於神明定義中興光贊大業陳三代之禮  
樂成一朝之制度雄詞奧學洞究天人以道弼予於茲五  
載每有大事乃心忠勤至於危難尤思赴蹈叶和堂上之  
謩匡濟天下之務出鎮梁益西南晏然人之具瞻朕所毗  
倚實仗宏化兼撫東郊宜以二南之風用增九鼎之重可  
兼東都留守餘如故主者施行

諭梁崇義詔

勅朕聞君臣之分義固金石將相之職任同安危在昔哲王罔不注意體合股肱則付之以大位道形終始則載之以丹書所以保親諸侯宏樹一德者也朕自纂統於茲三載兢兢業業日慎一日任夫難任安夫難安實賴公侯藩輔作鎮於外將帥戎士盡瘁勤王冀忠賢之同德躋億兆於仁壽思達寤寐動推至誠大開胸懷彰示天下雖奸邪不逞構造異端離間往來反白作黑下動危疑之勢上陳似是之言焚其表章前後數四未嘗不寘以極法竄於窮荒庶夫讒諛杜口謠妄卷跡中外上下俱臻大和豈止同

體之不疑萬方之知我而已金紫光祿大夫檢校刑部尚書襄州刺史山南東道節度使梁崇義往以邦家不寧襄漢未靜奮自諸將累建戎勲忠謀僉一保大安衆授鉞南紀表正江山勤輯士人克謹侯度惠化周洽俗阜風移踰二十年績用光備內修貢職首課方州朕夙茂勲德用崇爵命而忠規益勵亟請來朝期啟乃心以成吾事尋以郭昔鄭茂勲鄭和叔等奸謀參會庸狡妄作朕雖聽斷無惑寘以嚴科猶聞疑貳不安外求援助是何顛沛以舉謂我齷齪而闕憮然懷想深用歎惜夫禹湯前古之聖后也一

夫不獲有納隍之懼齊桓霸者之中人也舉讎棄怨致九  
合之功朕上而爲君子有萬國涉道日淺誠明未敷使心  
腹耳目之臣負義懷忠之士坐相猜阻交質往來構此異  
端頓虧大節頃亦頻遣將命諭達至情近得章奏猶云隔  
在恩外言之有犯豈爲是乎終用咎悔永思更始今予命  
爾檢校戶部尚書同中書門下平章事餘並如故兼賜以  
鐵券鏤其庸期於永終與國無極是表至公之舉用昭勿  
貳之懷嗚呼其敬之哉無再聽邪說無外蓄私心唯臣道  
是固惟國章是守天命可畏敬順予言其管內諸將三軍

官健久勤征鎮咸著忠勞數年已來未更敘錄比類諸道  
實合甄收其大將委中書門下即條件進擬自餘委本使  
一月內具名聞奏仍令殿中侍御史張著與使孟遊仙同  
往宣諭布告軍府令悉朕懷

請行兩稅法奏

凡百役之費一錢之斂先度其數而賦於人量出以制入  
戶無主客以見居爲簿人無丁中以貧富爲差不居處而  
行商者在所州縣稅三十之一度所取與居者均使無僥  
利居人之稅秋夏兩徵之俗有不便者正之其租庸雜徭



悉省而丁額不廢申報出入如舊式其田畝之稅率以大  
歷十四年墾田之數爲準而均徵之夏稅無過六月秋稅  
無過十一月逾歲之後有戶增而稅減輕及人散而失均  
者進退長吏而以尚書度支總統焉

請留崔寧以收蜀奏

蜀地富饒寧據有之貢賦不入與無蜀同若其有功則義  
不可奪是蜀地敗故失之勝亦不得也不若留寧發范陽  
戍兵雜禁兵往擊之何憂不克因得納親兵於其腹中蜀  
將必不敢動然後更授他帥使千里沃野復爲國有是因

小害而收大利也

言天下公賦奏

財賦者邦國大本而生人之喉命天下治亂重輕繫焉先  
朝權制以中人領其職五尺宦豎操邦之柄豐儉盈虛雖  
大臣不得知則無以計天下利害陛下至德惟人是恤參  
計敝蠹莫與斯甚臣請出之以歸有司度宮中經費一歲  
幾何量數奉入不敢以闕如此然後可以議政惟陛下審  
察

河西節度使廳壁記

皇帝肇建節制之任位以上將主四方之兵濟河而西五  
侯四將十有六縣大海磅礴乎終始山河迴流其左右旄  
頭虎力之勁劍服穹廬之長煌煌乎長轂千乘橫合萬里  
皆主乎是邦故秦已上爲戎都漢已下爲巨防有城府襟  
帶焉有良將大勲焉有五都污雜焉其風悍其國險鮮車  
龍服囂然相蕩非古之戰守曷以成其業而樹其風者哉  
昔在武德之初上用雄武大才則我隴西李王肅明乎神  
化大冢宰宇文公駙馬喬公出將我前軍中興之後循吏  
繼作則館陶侯郭公爽鳩氏司馬公相國韋公蕭公庶績

交修以被昇平之化當今王室多故雲海沸騰則僕射哥  
舒公以縱橫之奇判總軍國其意者將復用雄武大才乎  
君子曰武德之官神以畧其化成中興之政儉以行其俗  
阜當今之理動以闔其人安宜乎盡天下之才隨質文之  
變以永來裔大康乎斯時天寶十二年夏六月記

河西節度使杜公碑

周有召伯樹王風之始漢得留侯稱佐命之傑功赫於帝  
典名鏤於河圖維唐之受命大殪戎於西周皇帝感黷武  
之風思二南之化詢求卿士惠澤窮荒乃命兵部侍郎杜

金史卷之三  
公名鴻漸自河登車主盟西塞公英明博達淳粹先覺碩  
德漢庭之老中興佐命之勛體含一氣精合五老伊昔皇  
運中否河海風塵天子方僞遊北門之野公負霸王之畧  
感社稷之危緬懷風雲以身許國隱括王道旁觀厯象謂  
宇宙不可終閉兆庶不可無君龍吟空山雲起大澤追昌  
言以排世難告天命以成帝業日月盡蝕載之高懸鯨鯢  
躍波戮而爲醢史也奏嚮天之樂儒也觀嗣夏之書故登  
朝爲夔龍纂戎爲方召至於是邦也清其心而妙其用厚  
其惠而感其和與物也氣之陽春含靈也工之橐籥以爲

獷俗不足以勸賞故先悅以茂功貪人不可以害羣故問  
罪以去奸訛言不可以疑衆故畢詞以爲戮於是八藩以  
之匍匐三師以之投襃羣盜以之出奔巫人以之伏死古  
之作者不貴成功貴以德不憚濟世憚先仁樂生下齊明  
道者謂其強孫武講軍事上者知其固西門禱河明刑者  
恨其暴子玉佐楚治兵者慮其剛而公形體兼才智周乎  
萬類之變嚮合乎四會之中是神降歟詩云愷悌君子民  
之父母其來也邱陵如無其去也風雨可懷故吏兼侍御  
史唐朝英洎邑老其州長吏陳奉先等以炎耳目馨香記

之篆刻庶乎觀斯文者有襄南之慕頌遺美者深潁上之  
風銘曰

或或杜公虯蟠於奧人美其華我覩其操王用蓐畫大邦  
以造三錫輅車纂戎之號威肅惠時明神所勞何彼塞翁  
靡人仁報徘徊頌石永代作好

大唐燕支山神寧濟公祠堂碑

西北之巨鎮曰燕支本匈奴王庭昔漢武納渾邪開右地  
置武威張掖而山界二郡之間連峯委會雲蔚岱起積高  
之勢四面千里陽崖有栝栢之材備幹革陰壑有堅剛之

璞化五兵維人氣雄其畜多馬虜得之以制陰國主天街  
周以之興秦以之霸漢得之以斷右臂却南牧西距於海  
北瀦於河自外而望上也熊熊乎一氣旁蔭朔鹵前衡塞  
門與積石來朝崑崙相長洎陟蒼蒼臨峻極則形變六合  
空同大荒青冥在混元之中絕壁揭宇宙之外舊史云封  
祀之山八中國之外三自夏缺壤奠漢疆土宇時更百王  
莫能配天其意者將續禹之業以俟聖人乎維唐百有十  
載賁元化之紀息金革之虞茫蠢蒸然萃於聖澤於是左  
丹穴右崆峒古所未賓咸頓首於路門之外天子登神宮



勒金版將復義於羣岳告成於昊蒼議夫此山天合氣以  
正秋方地與神以主西國俾虯螭者爲師爲旅貔虎者爲  
妾爲臣不在於巨靈乎其封神爲寧濟公錫之輦帶備厥  
禮物詔邦牧太子少保哥舒公卜吉日築祠於高麓之陽  
每歲盛秋以笙鏞之器錡釜之品率封內以望之索羣神  
以會之亞旅師氏旄頭弩牙金鼓七校車徒十萬從饗於  
廟庭大閱於山外所以因天界以崇聖功乘地險而恢遠  
畧也觀夫叢巖懸抱煙雨屑宰宮庭晃其閑暮林石古而  
幽陰神其居之可以禱安靜矣拊空桑變鍾石神其聽之

可以感和樂矣大玉通帛熊蹯桂漿粲其傾筐采章煌煌  
神其歆之可以祚有年矣維石巖巖日月不老維靈是與  
生此熊羆神其薦之可以奉吾君矣於戲陳信克享正詞  
幽感宜乎有祈而降有祭而歆龍也無風雨之憊虵也無  
氣焰之作此神之職又何羞焉乃作頌曰

揭靈山兮天地界勢奔突兮風雲駭峰蹲龍兮入天門氣  
變蛇兮煙嵐昏祐自天兮得終古被華蟲兮駕朱虎

欽定全唐文卷四百二十二目錄

楊炎二

安州刺史杜公神道碑

雲麾將軍郭公神道碑

四鎮節度副使右金吾大將軍楊公神道碑

雲麾將軍李府君神道碑

唐贈范陽大都督忠烈公李公神道碑銘

并序

承天皇后哀冊文

欽定全唐文卷四百二十二

楊炎二

安州刺史杜公神道碑

受正性者德之元纂重侯者業之盛君子體仁以合德積厚以感通著于神明光於祚允者其惟杜公乎公諱鵬舉字某其先京兆人也七代祖諱模後魏爲濮陽守衛人宜之子孫世居東郡故今爲濮陽人夏有豢龍之官周封唐杜之國世載侯伯勲藏晉魯周公錫命元旗火龍拯三代之衰參五霸之業斯保姓之始也漢有建平侯策定中興

晉有當陽侯克并南夏其食鄴鄩盛西郊之黻冕其分荆  
濮胙東國之山河斯不朽之宗也濮陽生陳畱太守諱亮  
陳畱生高祖北齊膠州刺史竟陵公諱伽竟陵生曾祖隋  
鴈門太守諱保鴈門生大父唐蘇州司馬諱義寬蘇州生  
皇建平侯荆益二州大都督府長史諱慎行洎貞孝公秉  
哲以輔先朝今黃門戴天以成大業自魏七代以方岳登  
聞在唐兩朝以台衡致理斯邁種之仁也公貞孝之兄黃  
門之考天修其爵地富其才神抱虛廓智藏著蔡口目河  
海儀刑嵩華學可以掌邦教詞可以宣國風少與范陽盧

藏用隱於白鹿山以太夫人有疾與清河崔沔同授醫于  
蘭陵蕭亮聲色之微以誠達疵癘之祥以氣變屬先府君  
作鎮荆楚有詔門子親侍禁闈起家修武縣尉歲滿以書  
判超等授濟源尉以正議登朝拜右拾遺昇玉堂以謁聖  
君陳格言以利天下黃門侍郎張廷珪國之髦碩洛州長  
史皇甫知常人之標準美公志行嘗與請交公精義入神  
洞究奧蹟初睿宗踐祚冥感祥符覩元期於化元啟成命  
於幽教人所以佇非常之運天所以歸億兆之心元宗時  
在東宮表公所言請編史冊時應令賦詩御札批云畢公

之任諒籍伊人思入風雅靈通神鬼後以親累出爲岐州  
司倉轉同州司士開元初上以中都稍食省河漕之徭大  
農器用賦晉山之鐵牧馬于歸獸之野考室于迎春之宮  
關中始置疎決鹽鐵長春宮三使詔以公爲判官明年天  
子東行河隄陟格獸之場開濯龍之沼停鑾上苑留宴天  
泉酒酣樂過公獻賦以諷於是有采章之錫遷著作佐郎  
太子左贊善大夫都水使者邠王府司馬豐王府長史中  
散大夫安州刺史公爲政在上位畏于上貞一以守之齋  
莊以莅之其始也居右正詞王侯嚮慕其終也疎通簡易

禮化興行方將坐周召之堂陳歌訓之典法象魏登天庭而明德壽於中年壯圖悲於下國命矣以某年月日終於官舍明年二月葬于壽安之南原遵遺命也夫人河南郡君尉遲鄂國公之孫邛州刺史瓌之女也抱舍一之德友于君子受降神之祥克生元輔天寶四載終於山陽別業其終祔焉從周禮也長子靈瓊陳州太康主簿紹家祚而命奪其祿次子奉遙有異學而天喪其文荀陳同德顏閔齊化季子山南劍南道副元帥特進黃門侍郎同中書門下平章事衛國公鴻漸身負蒼旻氣和鼎飪以符合斯運



以道佐唐虞文繫訓謨化齊混象大勲格於皇極厚寵揚  
于祖考某府君先贈太常再榮師保夫人舊封宜陽增號  
某郡三錫桓公之命是尊孟母之賢惟公主忠孝根仁義  
事親有極致之道執喪有寧戚之哀威廢鞭笞慍忘誚讓  
其立身也冥觀天理合舍幽鑒強志通於眾藝敏行求于  
古人考聲教觀厯象動合靈祇之贊居順陰陽之和其達  
誠也憂喜極中權利交喪厯官十二遠悔吝之形春秋七  
十抱純精之氣其保終也君子謂探命厯誠也專藥膳孝  
也補衮職仲山之志也頌王風吉甫之才也濟美樂武之

德也有後臧孫之慶也宜乎正訓百代垂鴻千古存被先公之冕服沒爲天子之元老勒鐘鼎建廟堂金石以頌聲邱陵以表隧乃假詞末學觀德將來銘曰

於赫太師德音孔遐道之氣象物之精華文學鄒魯羽儀邦家選於帝庭帝庭有儀聞于官府官府允釐明晦光耀際舍天機識真紫極建旗青蒲熊負金印虵蟠朱組時哉功名海變今古精魂歸復宜陽之下我有冢嗣爲王寶臣德延沒世功被生人岸谷磅礴邱陵故新蒼蒼頌石萬世遺塵

雲麾將軍郭公神道碑

山之西出將地之右主兵故前有辛李之雄後稱周郭之  
盛四族者貌武其人風雲其氣出入千載戎狄憂之皇唐  
一宇宙之初數蠻夷之罪太白上天兵利陰精盛而神  
將出於是郭氏之室世並五侯丹華轂者三十人分采地  
者三千戶劍騎鼎食氣蓋關山開閣而珠履成行宴享而  
山元滿座中興之後鴻臚間出始以一劍而震清海年未  
三十名冠雲臺位爲國之長城身主人之大命銘旗羽葆  
小韓侯之故事龍旆青社增召伯之舊封則祖宗之盛未

始聞也鴻臚卽世關隴不震天其永思戡定之代故盛業  
集於金吾金吾名千里卽鴻臚之孫出於荆藍之中長於  
松栢之下虎頭駢脅曲踊雷聲猿臂過挾輶之材鷹揚表  
下韝之志始以將門子往還隴上開元中西討石國負羽  
先登特拜遊擊將軍折衝都尉駕龍媒於殷路舞雙劍於  
前席二十六載詔公與中使劉元復開葱嶺以功勝虜不  
能軍班師授左武衛將軍特賜衣甲一副超才也後五載  
有苑門之役走射鵬之羣拜左衛將軍嶺巖人陣旣成列  
而破石城天險不待戰而降累遷左金吾衛大將軍驟兼

玉門軍使未行而遇疾嗟乎病生刮骨志屈嗽肝累喉白  
刃之中垂翅青雲之上以天寶十一載二月薨于武威之  
地春秋若干夫人宏農郡君楊氏絳郡長史之孫臨洮軍  
使雲之女河華茂氣齊姜盛族和于鳴鳳而外姻致駕宜  
爾幹母而君子好述始於龍劍雙飛中而雲虹獨感春秋  
若干有子一人曰某果毅都尉山西將種塞下雄兒周郎  
之豪勇冠軍終子之精魂先返年二十一先公而天郭氏  
本自周王之穆其在昔也漢有司徒司空魏有車騎驃騎  
或竹馬垂信或金玉稱豪世后佐漢以補天賢王築館而

爲道其在今也一門三戟六葉七侯伊吾反昭于前鴻臚  
特坐于後長河萬里敵國四方每賓祭往來蒐除大閱望  
帶裳者知宗廟之盛執金鼓者成父子之軍世德後來公  
其濟美則勲配祀典中乏主祭之名哀及路人內無朝哭  
之位此窈窕之數孰可問哉猶子子鸞善達禮以繼門族  
樂主辨以濟險艱苟令君爲不亡趙將軍其有子以十三  
載某月葬我公于武威東原非緩也實卜年龍蟠天井岡  
伏山形闕星象于元宮起風煙于松闕將軍鼓吹迴過細  
柳之營天子輅車出祖茂陵之道銘曰

壯哉強魂凜然風雨一劍剗鯨空拳搏虎錫以翽鼓艣舳  
倅瑒駢騎佩組華彼莊姜揄狄珩璜言念君子乃心無忘  
精返太白魂歸故鄉雙墳巍然流水湯湯秦雲如牛礪石  
如羊二龍於此父子同岡

四鎮節度副使右金吾大將軍楊公神道碑

昔我乃祖世族關西左華右河前號後晉食唐虞之地首  
韓魏之封大輅輦瑒彤弓之錫此之謂保姓在帝爲高辛  
氏在周爲司徒在秦爲上卿在漢爲太尉此之謂世祿太  
尉之道齊宣父大夫之文似相如此之謂世德內史之採

金虎赤泉之斷江龍兗州佐命於齊驃騎重侯于晉建公  
能官其業此之謂武功公名和字惟恭河東人也爲高祖  
驃騎之曾孫大父諱言隋朝散大夫國士經術之奧高論  
上庠洎河海風塵吳興敗露出補棣州蒲臺令考諱楷河  
州大夏縣令以神明之化出綰桐鄉驥跼于轅蛇蟠于沼  
公賢明本乎祖德精勁因乎地氣好兵有秦韓之俗受學  
得孫吳之書發跡洮隴成功西極仗劍出萬人單車入絕  
域則羣兇下拜室胡隧則漠地空疑所以利建侯成輅之  
賞凡三破石國再征蘇祿開勃者三誅達覓者一始自弱



水府別將至執金吾十五攻常冠軍鋒大小百餘戰竟終  
牖下初開元中羣胡方盛南寇于闐公以中軍副鼓行而  
前雲火照于王庭雷霆起於帳下故羸師破竹後騎建瓴  
灌夫之勇也二十七年有詔四鎮諸軍大出漢南壘問罪  
蘇祿洗兵滇河旌甲數萬人城池五十國公以麾下爲前  
四罪之名有百牢之饋酈生之奇也後五載有累姓之後  
來朝京師金甲善馬織文大貝告于廟之室旅于大庫之  
庭公覽傳常遺風烏孫故事井泉可數談笑成功上壯之  
賜弓甲一副廐馬二疋伏波之美也明年元帥封常清署

公行軍司馬都虞侯西討石國觀兵海隅歷莎車臨大夏  
見條支之卵飲郅支之頭烜兮赫兮雲捲萬里博望之畧  
也自武衛將軍四鎮經畧副使加雲麾將軍兼于闐軍大  
使其地兵甲之富寶玉之林公鎮以清靜同其習俗如鼓  
簧琴政用大康又遷金吾大將軍四鎮節度副使金紫之  
貴樊纓羽旄雄風凜然壯圖未極方將戴衣冠於地表會  
風雨於天庭夢厲成灾明淫生戾以十四載五月薨於鎮  
西之官舍春秋若干夫人晉陽賈氏彼美孟姜顏如桃李  
靈劍始合泛于碧海之潯鵝鵝漸冲坐于金蓮之界嗣子

預有霸王之畧好倜儻之奇初以右武衛郎將見於行在  
天子美其談說問以中興遂西聚鐵關之兵北稅堅昆之  
馬起日城開天郎特拜左衛將軍兼瓜州都督關西兵馬  
使又遷伊西北庭都護策茂勲也誅門人以息羣盜設勇  
爵以酬諸戎鍾鼓再考駢旄旣備可以答明君告宗廟揚  
于祖考有銘篆之功問於著龜無松榆之舊以月日與次  
于某葬我公于某所禮也於戲昔齊方草昧而兗州降隋  
室始創而驃騎興當今受命而武作豈公侯之美必復將  
輔佐之跡有歸歟中丞以炎聽于親宗服于祖業捧持簡

牘見託斯文邛陵蒼蒼歸于萬世地連汾水之舊基望虞鄉之古祠遠蒼龍松寒石馬晉人墮淚如看峴首之碑漢將焚舟遙識祁連之冢銘曰

偉哉忠壯萬夫之冠熊視三軍鷹揚霄漢星殞月窟魄沈海畔寥落英風功名相半我有令子王之寶臣勛參十亂名畫麒麟光華玉帳出入朱輪祠于上蔡奉我先人反葬何鄉言歸晉土蒲阪之北汾陰東澣雲雨千峰山河萬古蟠青蛇兮負騰虎埋金劍兮何時覩

雲麾將軍李府君神道碑

斗極之下曰幽都其氣骨立其風精悍常山之下曰涿野  
其鎮碣石其神蚩尤海岳迴抱府君出焉雲龍感召府君  
感焉惟天永保唐運故府君來朝克生保臣輔寧大業坐  
中台者二子銘鼎彝者六朝當國宣九合之勲昇堂有八  
元之族府君諱楷洛先族漢校尉之裔也世居其北遂食  
堅昆之地實主崆峒之人大爲王公小爲侯伯其精薄日  
月其動破山川厥後東遷復爲鮮卑之右府君英明淳渾  
神踴天飛威嚴生介冑之容魁岸本山河之狀雙舞長劍  
左盤琯戈虎嘯于窮溟雲從于大澤有沈謀以忠中國有

長技以服諸戎天子聞而思之密命奇士要之信誓君子  
曰井谷不可以遊龜龍蟻垤不可以栽松柏淮陰去楚百  
里絕虞尚父從周樂生歸燕此必精合於王霸魄見於祥  
符宜乎萬方而趨一言而感矣是年冬府君與帳下騎士  
言曰吾乃祖本漢將辱于單于之庭而今千年大恥壯士  
當建功大國上駕真龍曷有遇風雨而泥蟠無卷舒以蜿  
變由是奮躍遼海翻飛上京其來也戎羯生憂其至也幽  
燕罷警上御前殿庭列千官鍾石畢陳君臣相賀始問其  
姓因賜以家族特拜玉鈐衛將軍先賜以大弓文馬又拜

左奉宸內供奉升玉堂食沆瀣矣帝曰余欲成幽都殪死  
市乃命府君爲朔方討擊大總管於是雲麾鐵騎川動地  
踊左飲青海北登狼山帝曰余欲宅嶠夷破鴨綠擊靺鞨  
俘林胡乃命府君兼幽州經畧使於是間榆關橫障塞三  
以奇伏五以勝歸帝曰余欲軍北方之野乃命府君爲清  
軍於是敵也無氣燄之作士也無踴躍之勞帝曰余欲護  
垆牧之使於是憑列走隊法掩亭院神螭水瑞孔阜充碩  
帝曰余欲書日月之常教熊羆之旅咨爾職典彼朔方復  
命府君爲節度副使於是鎮之以德宣之以威師和年豐

罔或不若帝曰余欲配勾陳之位養死事之孤乃命府君  
爲左羽林將軍於是蓬頭射聲上貫牛斗帝曰余欲屠石  
堡疇其代謀僉曰府君乃命佐中權發大號於是元黃灑  
血玉石俱摧載初中兩蕃不庭有詔府君尋盟舊國單車  
從漢二憾來同戎狄變心懼我爲患乘主客之勢合豺狼  
之兇甲興于門車結其外府君復爲死地甘爲國羞仰而  
騰駒若與神遇橫跳出於虎口伏念歎於龍顏的盧之師  
惡可喻也吐蕃之寇河源衝下憑突矢石交作府君以精  
騎一旅濟河之南萬火燎于他山三軍出其閒道驚寇四



潰重圍自解加竈之奇孰云多也初府君將赴征西謂所親曰余往必克敵殆不能歸及班師獻捷歿於中路明達人之委順君子之終鄧公之勇曷其智也至若秉季布之然諾法穰苴之政教動於軍誌舉合吏能奇謀絕於揣摩故事畱於風俗神對厯象精合晦明勤道不形進而人莫見也爲政以德寵而久彌尊也始自天后之末至於聖皇之朝前後錄功凡二十四命食邑二千七百戶封薊郡開國公又加雲麾將軍參定國者兩朝拖侯服者四紀會兵車者百勝出帳下者千人國有事未嘗不勤勞無私可謂

知禮故得大命三錫重侯累封輅車山元藏於太室壯圖  
未極沉疾生勞臨合浦之秋伏波將老望河源之道征虜  
不歸其年某月日薨于靈州懷定縣之師次享年六十有  
七追贈營州都督賻物三百疋米粟三百石以明年某月  
日詔葬於富平縣檀山原禮也夫人某郡都鴻臚卿某之  
女異氣祥合高門鬱興卜鄰也鍾鼎再懸受祿也夔龍在  
席元子太尉臨淮郡王兼侍中光弼河圖鉤合上感神精  
磅礴於陰陽之和同符於元命之紀次子將作監光彥氣  
含精勁仁服孝慈列侯於千石之家從事於四方之志少

子太保光進命世忠義縱橫知畧天之辰象物之粹靈乾  
元中太尉以東諸侯三會于河再以駢髯濟於淮海天子  
美齊桓之志系凡蔣之盟以府君炳德丕赫積流仁慶追  
考功績發於簡書諡曰忠累有褒贈號韓國夫人於是建  
廟堂命宗祝室有山龍之服饗有金石之和昭宣令圖煥  
然銘篆以炎掌史之官也奉命爲詞徘徊大名頌耿弇有  
終有慶慷慨觀德美張仲爲子爲臣銘曰

茫茫上天下降狼星崆峒之野焜燿其形於赫巨唐風雨  
是經矧伊本邦曷不來庭煌煌府君爲國之翰從順于戎

威讎勦亂陰剛萃靈渤碣精悍

闕四

志不可翫綿綿塞草

天地之下北拒狼山野無胡馬殊勲大績玉劍元社天空  
武庫海折崑崙在昔遺慶魯之臧孫曰聖在天勤於至道  
既命太尉亦崇太保一門四龍三作元老赫赫元老氣合  
清貞白髮垂冕高堂有親帝命韓國胙於夫人亦詔薊邱  
下寵明神左鑿貞石垂於將來矧我洪勲上懸雲臺彼邱  
之頽此澤之堆悠悠令惠萬古不回

唐贈范陽大都督忠烈公李公神道碑銘

并序

秦霸也張祿去魏漢興也淮陰離楚龍鳴風雨之會蛇變

泥蟠之中逶迤感通精氣相合斯冥契也豈人力也皇唐  
贈司空范陽大都督李公諱楷其本出於隴西八代祖節  
後魏鴈門太守燕齊之亂族沒鮮卑東遷號良將之家北  
部實大人之種其生渤碣其居戴斗海塞迴抱興公之氣  
天星下直爲國之祥英氣混茫熊據龍驤望其形得山河  
之狀觀其容見金鼓之威神明爲徒義勇爲器久視中以  
驍騎歲入于遼西臨太原南震燕趙雲火照于河上天兵  
宿于北門朝廷憂之有命招諭合以信誓際于天人話言  
感寤撫劍歎息是歲以控弦之士七百騎垂橐入塞解甲

來朝以其本枝復賜李氏授玉鈐衛將軍左奉宸內供奉  
圖形雲閣之中置酒蓬萊之上君臣相賀羽衛生光君子  
曰井谷不可以游龜龍蟻垤不可以戴松柏漢於是始靖  
虜於是始憂是後殪靺鞨於鴨綠之野覆林胡於榆關之  
外北出障塞懷其王庭南救河源復其死地石壑之役以  
一旅定三軍冷陪之師以虛聲破精勁東封之歲外將天  
軍河湟未寧西護監收雲麾鐵騎山動地踊右據青海北  
登狼山冰泮則會師風高則出塞皇威振於四海王化敷  
於無外故得大命三錫天馬輅駟定國難者兩朝拖侯服

者四紀會兵車者百勝出帳下者千人國有事未嘗不勤  
勞無私可謂知禮於戲天道曖昧胡星未殞以營平之年  
不終大用以伏波之病再出窮荒天寶元年五月二十日  
自河源薨于懷遠縣之師次春秋六十七贈營府都督明  
年詔葬于富平縣壇山原維公智之大寶神之異門心和  
體剛慮遠精徹思乎耳目之外行乎變化之中震呼戎獠  
嘯叱風雲貔虎之悍以禮成百萬之強以謀勝故鮮卑因  
之以疲中國天后取之以空大漠於中宗開朔方之地四  
百里於睿宗食佐命之邑三千戶於元宗則主禁衛吞諸

戎東西南北動罔不剋禦戎安邊凡十命焉祚於後也元  
子太尉中書令東都河南江淮等道副元帥臨海郡王光  
弼少子太保御史大夫渭北鄜坊等州節度使武威郡王  
光進負河圖以列四星遇英主而當三傑肅宗之功復區  
宇更爲桓文今上之道訓華夷並爲召畢乾元中天子以  
公炳德丕赫積仁流慶大福再成沒而不朽乃命太常追  
考功績謚曰忠烈贈司空范陽大都督夫人贈號韓國夫  
人於是建廟堂命宗紀室有山龍之服樂有鍾石之和昭  
宣令圖是有銘篆銘曰



茫茫上象降精於北是生純臣其在異國矯矯府君蔚其  
英靈蛇蟠北極鵬化南溟來于本邦會此天庭風驅虎旅  
晝食狼星綿綿塞草天隔華夏北拒陰山野無胡馬殊勲  
大績玉劍元社天摧武庫海折崑崙在昔遺慶惟魯臧孫  
曰聖在天勤于至道旣命太尉又崇太保一門四龍二作  
元老赫赫元老氣含清真白髮重冠高堂有親帝命韓國  
胙于夫人亦詔薊邱下寵明神彼邱之榛此石之磷悠悠  
令德萬古清塵

承天皇后哀冊文

維大厯三年歲次景午四月乙未朔五日庚子故齊王諡  
曰承天皇帝妃張氏諡曰恭順皇后天寶末賊臣構難王  
從二聖南幸成都自武功定策禁中扈先帝於靈武以是  
年八月薨於行在今上錄功追遠詔諡鴻名以大厯三年  
六月遷座於咸陽禮也雲翽宿懸天雞空響建翠鳳以雙  
引度蒼龍而長往皇帝慟極天倫齋於閒館望桂嶼之蕭  
颯撫蘭臺之傷斷爰詔近臣遺音是纂其詞曰

皇圖氛氲麗于天文本枝百代連華千載維王斯會其祥  
則大祖武之烈宗文之配令德純粹溫恭慈愛和必有節

動而無悔持盈以冲明道若昧金玉是式鼓鐘於外伊昔  
慶衍維皇握圖天孫載弄甲觀晨趨善問居講嚴師服儒  
瓊林秋實寶萼晴敷皇用錫土苴茅剖符大邦之翰滄海  
之隅遙分朱邸近植青梧愛鍾嘉會寵被宸渥從侍寢門  
觀風太學禮聞齒讓聽辨聲樂歷運中否災鯨構昏初避  
夷狄聖有昌言王叶羣議天迴乘轅適於砮礪之野進于  
閭闔之門雲趨河北電掃中原方從廟告言守藩垣忽川  
逝于東海怨夜長于西園嗚呼哀哉志業見於屯蒙勲名  
留于天壤成宗裡之有聖悲歡愛之易喪獨精聚而魂游

奉君親以長往展我邦媛德容可仰魯館而家齊風是長  
翟拜三月輶歸百兩豈鳳吹之有行而虹銷之無像嗚呼  
哀哉帝念伊始晬容生憂傷桂絆之幽靈望山河之林邱  
解劍龍而追慟燭鴻徽以冥搜駕之輅旗服以冕裘儼千  
官於天衛將合祔而從周嗚呼哀哉笳鼓宵陳河山曉發  
地塊軋兮聲遠天空同兮影沒入幽隧之穹林伏盤原之  
宮闕嗚呼哀哉考至公與至性見爲子兮爲臣臨難不忘  
其社稷感時思致於君親短而非病逝豈同塵惟芳名與  
盛德可觀法以求仁嗚呼哀哉